

**“Тасдиқлайман”**  
**Тошкент вилояти Кибрай**  
**тумани хокимлигининг**

“ \_\_\_\_\_ ” \_\_\_\_\_ 2016 й.  
№ \_\_\_\_\_ сонли қарори билан  
давлат рўйхатига олинди.

**“Тасдиқлайман”**  
**Ўзбекистон Республикаси**  
**Фанлар Академияси президенти**  
**академик**  
**Ш.И. Салихов**

“ \_\_\_\_\_ ” \_\_\_\_\_ 2016 й.

**ЎЗБЕКИСТОН РЕСПУБЛИКАСИ ФАНЛАР АКАДЕМИЯСИ**  
**ГЕНОМИКА ВА БИОИНФОРМАТИКА МАРКАЗИНИНГ**

**Н И З О М И**

ТОШКЕНТ 2016

## **I. Умумий қоидалар.**

1. Геномика ва биоинформатика маркази Ўзбекистон Республикаси Фанлар академияси, Қишлоқ ва сув хўжалиги вазирлиги ва “Ўзпахтасаноат” акциядорлик жамиятининг 2015 йил «31» декабридаги № 14/2/20/11-сон қўшма буйруғига мувофиқ Ўзбекистон Республикаси Фанлар академияси таркибида давлат илмий-тадқиқот муассасаси сифатида Ўзбекистон Республикаси Фанлар академияси президентининг 2016 йил “7” январидagi № 4-3 буйруғига асосан ташкил этилган.

2. Мазкур Низом Вазирлар Маҳкамасининг 2006 йил 16 октябрдаги 215- сонли қарорига мувофиқ ишлаб чиқилган.

3. Геномика ва биоинформатика маркази бевосита Ўзбекистон Республикаси Фанлар академиясига бўйсинади.

4. Геномика ва биоинформатика маркази ўз фаолияти давомида Ўзбекистон Республикасининг Конституциясига, Ўзбекистон Республикаси Қонунларига, Ўзбекистон Республикаси Олий Мажлис палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, Ўзбекистон Республикаси Фанлар академиясининг қарорлари ва буйруқларига ҳамда ушбу Низомга асосан амал қилади.

5. Геномика ва биоинформатика маркази юридик шахс мақомига эга бюджетдан молиялаштирилган илмий-тадқиқот муассасаси бўлиб, Ўзбекистон Республикаси Давлат гербининг тасвири туширилган ва ўз номи ёзилган муҳрга, ўз бланklarига, мустақил балансга, Ўзбекистон Республикаси Молия вазирлиги ғазначилигида ҳамда Ўзбекистон Республикаси банкларида миллий ва хорижий валютадаги ҳисоб рақамларига эга бўлади.

6. Марказнинг тўлиқ номи:

Ўзбек тилида – Ўзбекистон Республикаси Фанлар академияси Геномика ва биоинформатика маркази

Инглиз тилида – Center of Genomics and Bioinformatics of the Academy of Sciences of Uzbekistan

Рус тилида – Центр геномики и биоинформатики Академии наук Республики Узбекистан

7. Марказнинг юридик манзили: Тошкент вилояти, Қибрай тумани, Университет кўчаси 2-уй.

## **II. Геномика ва биоинформатика марказининг вазифалари ва функциялари**

8. Қуйидагилар Геномика ва биоинформатика марказининг вазифалари ҳисобланади:

Ўзбекистон учун устувор бўлган барча қишлоқ хўжалиги экинлари (ғўза, буғдой, шоли, маккажўхори, соя, сабзавот, полиз экинлари ва ҳ.к), доривор ва техник ўсимликлар, микроорганизмлар (жумладан фитопатогенлар) ҳамда истикболли тарзда ҳайвонлар, инсон ва бошқа биологик объектлар

геномларини чуқур тадқиқ қилиш, хўжалик аҳамиятига эга бўлган қимматбаҳо генлар тузилишларини ва фаолликларини ўрганишга бағишланган фундаментал, амалий ва инновацион тадқиқотларни амалга ошириш;

генлар инженерлиги мақсадларида турли генетик йўллар (genetic pathways) таркибига кирадиган янги оқсиллар ва ферментлар (протеомика), бирламчи ва иккиламчи метаболит (метаболомика) ларни ўрганиш ва уларнинг асосида ген-инженерлик технологияларини ишлаб чиқиш;

ўрганилган геном ахборотларини замонавий биоинформатик усуллар ёрдамида комплекс равишда таҳлил қилиш лойҳаларини олиб бориш;

тадқиқ қилинган геномлар ва биоинформатик таҳлиллар асосида замонавий ген ва хужайра инженерлиги, маркерларга асосланган селекция (МАС), геном селекцияси (ГС), виртуал селекция ва моделлаштириш дастурларини ишлаб чиқиш ва улар негизида юқори сифатли, стресс омилларига чидамли қишлоқ хўжалиги экинлари ва ҳайвонларнинг янги “генетик бойитилган” нав ва зотларини яратиш бўйича фундаментал, амалий ва инновацион тадқиқотларни амалга ошириш;

геном технологиялари асосида яратилган “генетик бойитилган” ўсимликлар навларининг бирламчи уруғчилигини ташкил этиш, уларни республиканинг турли минтақаларида синовдан ўтказиш ҳамда районлаштириш ишларини амалга ошириш;

генетик ўзгартирилган организмлар ва уларнинг маҳсулотларини сертификатлаштириш;

геномика ва биоинформатика бўйича ўзаро манфаатли халқаро алоқаларни янада ривожлантириш, хорижий ҳамда республика олий таълим ва илмий муассасаларида кадрларни тайёрлаш, уларни мунтазам равишда малакасини ошириб бориш;

йирик фундаментал, илмий-техник, ишлаб-чиқариш, ижтимоий-иқтисодий лойиҳаларни экспертиза қилишда иштирок этиш.

9. Марказ асосий вазифаларидан келиб чиқиб, қуйидаги функцияларни амалга оширади:

Ўзбекистон Республикаси Фанлар академиясининг таалуқли бўлинмалари ҳамкорлигида билан биргаликда фундаментал амалий тадқиқотларни дунё фани даражасида ривожлантириш, уларнинг давлат илмий-техник дастурлари доирасида устувор равишда молиялаштириш, илмий кадрларни тайёрлаш ва мутахассисларни чет мамлакатларнинг нуфузли марказларида малакасини ошириб бориш ҳамда тўпланган билим тажрибаларни олий таълим тизими билан узвий боғлиқлигини таъминлаш;

қишлоқ хўжалиги экинларининг янги яратилган истиқболли навларини дала шароитларида кенг синаш, уруғларини кўпайтириш, ишлаб чиқаришга жадал жорий қилиш ишларини Қишлоқ ва сув хўжалиги вазирлиги ва “Ўзпахтасаноат” акциядорлик жамиятининг таалуқли бўлинмалари ҳамкорлигида олиб бориш;

белгиланган тартибда тасдиқланган режага ва давлат илмий - техник дастурларига мувофиқ, тармоқ ва минтақавий муаммоларни ҳал қилиш бўйича турли организмлар геномларини ўрганиш устида фундаментал, амалий ва

инновацион изланишлар, лабораториявий тадқиқот ва тажриба ишларини ўтказиш;

геномика ва биоинформатика йўналишида республиканинг бошқа илмий-тадқиқот марказларида ва олий ўқув юртлиари кафедраларида бажарилаётган илмий ишларни мувофиқлаштириш;

геном технологиялари асосида яратилган “Генетик бойитилган” навларнинг бирламчи уруғчилигини ташкил этиш ва уларни Қишлоқ ва сув хўжалиги вазирлигининг тегишли ташкилотлари билан биргаликда районлаштириш ишларини амалга ошириш;

генетик ўзгартирилган организмлар ва уларнинг маҳсулотларини республикага олиб кириш, улардан фойдаланиш бўйича Ҳукуматга таклифлар тайёрлаб, талаб қилинганда генетик ўзгартирилган организмлар ва уларнинг маҳсулотларини бирламчи лаборатория тестларини тўлов асосида ўтказиш ва белгиланган тартибда сертификациялашни амалга ошириш;

ишлаб чиқариш ташкилотларига услубий ёрдам ва тўлов асосида молекуляр-генетик хизматлар (жумладан турли биологик объектлар учун молекуляр паспортлар яратиш, касалликларни ген-диагностикаси каби) кўрсатиб, марказда жорий этилган илмий ишланмалар устидан муаллифлик назоратини амалга ошириш;

илмий тадқиқотларни дунё даражасида олиб бориш мақсадида чет эл илмий марказлари ва уинверситетлари билан ҳамкорликда замонавий технопарк ташкил этиш;

кадрлар тайёрлаш ва уларни қайта тайёрлашни ташкил этиш;

марказ мустақил стажёр-тадқиқотчи-изланувчи ва катта илмий-ходим-изланувчилар учун қулай шароитлар яратиш ҳамда Ўзбекистон Республикаси Вазирлар Маҳкамаси ҳузуридаги Фан ва технологияларни ривожлантиришни мувофиқлаштириш кўмитаси томонидан ажратилган йиллик квота асосида фан соҳага докторларини тайёрлашда фаолият олиб бориш;

истикболда геномика ва биоинформатика соҳасида фан ва техника ривожининг асосий йўналишлари бўйича ривожланишни мунтазам кузатиб бориш, соҳада рўй бераётган янгиликлар юзасидан мутасадди вазирликлар ва Республика Ҳукуматида мунтазам ахборот бериб бориш;

олинган натижаларни қишлоқ хўжалигига жорий қилишда ва тиббиётда қўллашда вазирликлар, ишлаб чиқариш бирлашмалари, корхоналар билан ҳамкорлик қилиш;

зарур ҳолларда илмий-тадқиқотлар мавзусини янгилаш, долзарблигини йўқотган йўналиш ва муаммолар бўйича тадқиқот ишларни ўз вақтида тўхтатиш чораларини кўриш;

геномика ва биоинформатика йўналишида республиканинг бошқа илмий-тадқиқот ва олий таълим муассасаларида бажарилаётган илмий ишларни мувофиқлаштириш;

илмий ишларнинг (лойиҳалар ва талабномалар) танловини ўтказишда қатнашиш ва уларнинг натижалари бўйича тижоратлаштириш таклифларини киритиш;

илмий ва илмий-техник муаммолар бўйича маҳаллий ва халқаро миқёсда съездлар, конференциялар, семинарлар, симпозиумлар, анжуманлар, кенгашлар

ташқил қилади, тармоқ илмий ва илмий-техникавий жамиятларнинг ишида иштирок этиш;

илмий кадрлар тайёрлашни, шу жумладан хорижий давлат фуқороларидан (шартнома бўйича), шунингдек, уларнинг малакасини оширишни таъминлаш;

илмий кадрлар таркибни мунтазам равишда истиқболли олимлар ва иқтидорли ёшлар билан тўлдириб бориш;

илмий ходимлар ўртасида лавозимларни эгаллаш учун танлов ўтказди, улар билан меҳнат ва ҳуқуқий муносабатлар бўйича 5 йилгача шартнома тузиш;

тадқиқотлар натижалари бўйича монография ва илмий мақолалар чоп этиш;

ҳалқаро ҳамкорликни амалга ошириш (шу жумладан ташқи иқтисодий фаолият асосида)

илмий изланишлар юзасидан кенг тарғибот ишларини олиб бориш;

марказда бажарилган ишлар бўйича илмий ва муаллиф устуворлигини ҳамда давлат манфаатларини ҳимоя қилиш;

бажарилаётган режадаги илмий-тадқиқот ишларини қайд қилиш, тегишли ташкилотларга бажарилган ишлар юзасидан илмий-техник маълумотлар ва ҳисоботлар тақдим этиб бориш, ўз фаолиятида илмий-ахборот маълумотларидан тўла фойдаланишни таъминлаш;

дунёни етакчи марказлари билан давлат манфаатларидан келиб чиқиб республика ва халқаро миқёсда илмий-инновацион ва ўқув-тренинг жараёнлари фаолиятини амалга оширадиган юқори технологик марказлар (технопарклар)ни ташқил қилиш бўйича таклифлар тайёрлаш ва уларни ташқил қилиш ҳамда фаолиятини юритишда иштирок этиш.

### **III. Геномика ва биоинформатика марказининг ҳуқуқлари**

10. Геномика ва биоинформатика маркази унга юклатилган вазифалардан келиб чиқиб қуйидаги ҳуқуқларга эга:

биологик объектлар геномлари устида фундаментал, амалий ва инновацион тадқиқотлар олиб бориш;

геном технологиялари асосида яратилган “генетик бойитилган” навларнинг бирламчи уруғчилигини ташқил этишнинг такомиллаштириш бўйича таклифлар бериш;

маҳсус уруғчилик хўжалиги фаолиятида алмашлаб экишдан олинган маҳсулотларини сотиш ва ундан тушган маблағлардан ушбу Низомнинг 19 ва 21-бандига мувофиқ фойдаланиш;

катта илмий-ходим-изланувчи институтларини очиш учун таклифлар киритиш ҳамда бу институтлар учун Ўзбекистон Республикаси Вазирлар Маҳкамаси ҳузуридаги Фан ва технологияларни ривожлантиришни мувофиқлаштириш кўмитаси томонидан ажратиладиган йиллик квоталарни олиш;

марказ қошида йўналишга мос илмий ихтисосликлар бўйича диссертацияларни ҳимояларини ўтказиш бўйича Ихтисослашган кенгаш очиш

тўғрисида Олий Аттестация Комиссиясига таклифлар киритиш ва унинг фаолиятини шакллантириш;

Ўзбекистон Республикаси Фанлар академияси, Ўзбекистон Республикаси Вазирлар Маҳкамаси ҳузуридаги Фан ва технологияларни ривожлантиришни мувофиқлаштириш кўмитаси, Қишлоқ ва сув хўжалиги вазирлиги ҳамда “Ўзпахтасаноат” акциядорлик жамиятига ҳамда бошқа муттасадди ташкилотларга Марказни моддий-техник базани мустаҳкамлаш, уни замонавийлаштириш ҳамда тадқиқотлар учун қулай шароит яратиш бўйича таклиф киритиш;

геномика ва биоинформатика бўйича ўзаро манфаатли халқаро алоқаларни боғлаш ва уларни кенгайтириш таклифларини киритиш;

илмий тадқиқот натижалари, фанни ютуқлари ва кашфиётларига бағишланган илмий, илмий-оммабоп мақолалар, монографиялар, журналлар, анжуман материаллари, буклет ва постерлар ҳамда турли тарқатма материалларини чоп этиш;

дунё фани ривожланиш тенденциясига муфовиқ марказ асбоб-ускуналарини ва керакли жиҳозларини янгилаб бориш;

соҳага малакали кадрлар тайёрлаш, маҳаллий ва халқаро миқёсда ўқув тренинг дастурларини ишлаб чиқиш ва уларни амалга ошириш, ходимларни халқаро марказда малакасини ошириш бўйича таклифлар тайёрлаш, зарурий ва самарали ҳолларда геном технологиялари бўйича маҳаллий ва хорижий ташкилотларга (шартномага мувофиқ) қонун доирасида тўловли тренинг хизматлар кўрсатиш;

республикага олиб кирилаётган генетик ўзгартирилган организмлар ва уларнинг маҳсулотларидан фойдаланиш ва назорат қилиш қонунларини ишлаб чиқишда иштирок этиш;

Ўзбекистон Республикаси Фанлар академияси, Ўзбекистон Республикаси Вазирлар Маҳкамаси ҳузуридаги Фан ва технологияларни ривожлантиришни мувофиқлаштириш кўмитаси ҳамда Қишлоқ ва сув хўжалиги вазирлигида йирик фундаментал, илмий-техник, ишлаб-чиқариш, ижтимоий-иқтисодий лойиҳаларни экспертиза қилишда иштирок этиш;

илмий-тадқиқотлар, тажриба ва экспериментал ишлар ва уларнинг натижаларини ишлаб чиқаришга тадбиқ этиш бўйича истиқболли лойиҳалар ишлаб чиқиш;

илмий кадрлар тайёрлаш, уларни қайта тайёрлаш, малакаларини ошириш бўйича режа-дастурлар ишлаб чиқиш;

ташкилотлараро муассасалар учун тақчил ва устувор мутахассисликлар бўйича изланувчиларни мақсадли тайёрлашни ҳисобга олган ҳолда стажёр-тадқиқотчи-изланувчи ва катта илмий ходим-изланувчи институтларига қабул қилиш режасини ишлаб чиқиш;

ўзининг асосий йўналиши бўйича анжуманлар, семинарлар, симпозиумлар ва шу жумладан халқаро тадбирлар режаларини ишлаб чиқиш ва амалга ошириш;

марказ ўз йўналишидаги фаолияти бўйича буюртмачилар билан шартномавий илмий-тадқиқот ва тажриба-конструкторлик ишларининг ҳажмини мустақил белгилаш;

илмий лойиҳаларни амалга ошириш учун ажратилган чет эл ва ички грантлар доирасида чет эллик мутахассислар билан ҳамкорлик қилиш;

олимларнинг илмий фаолиятини таъминлаш учун қулай шароит яратиш;

марказ олимлари томонидан ишлаб чиқилган янги ишланмалар ва кашфиётларни республикада ҳамда халқаро миқёсда (белгиланган тартибга кўра) патентлаш, уларни марказ ва давлат (халқаро патентлар учун) манфаатларини кўзлаган ҳолда лицензиялаш, муаллифлик ҳуқуқларини ҳимоя қилиш тўғрисидаги меъёрга риоя қилган ҳолда давлат бюджетидан молиялаштириладиган фундаментал ва амалий тадқиқотлар натижаларини давлатга топшириш;

илмий-тадқиқот ва тажриба-конструкторлик ишларини, узлуксиз ва бир маромда амалга оширишни таъминловчи зарурий хом-ашё, ёқилғи ва бошқа ресурслар захираларига эга бўлиш, уларнинг тежалишини назорат қилиш;

ҳаво, тупроқ ва сув ҳавзаларини ҳўжалик чиқиндилари, оқава сувлар ва чиқитлари, шунингдек шовқин ва радиошовқинларидан муҳофаза қилиш бўйича зарур чора тадбирларни амалга ошириш;

ходимларни ижтимоий ҳимоя қилиш чора тадбирларини кўриш;

турли фирма, мулкчиликнинг турли шакллари билан фаолият юритадиган кичик ва кўшма корхоналар, шунингдек, нодавлат ва ноижорат ташкилотлар, илмий тадқиқотларни қўллаб-қувватлайдиган фондлар ташкил қилиш.

#### **IV. Муассиснинг ҳуқуқ ва мажбуриятлари**

11. Муассис ташкилот Ўзбекистон Республикаси Фанлар Академияси қонун ҳужжатларида белгиланган тартибда куйидаги ҳуқуқ ва мажбуриятларга эга:

Ўзбекистон Республикаси Фанлар академияси Марказнинг илмий фаолиятига ва яратилган янги навларини ишлаб чиқаришга тадбиқ этишга раҳбарлик қилади ҳамда марказ илмий лойиҳаларини ўрнатилган тартибда молиялаштириб боради ;

Марказ фаолиятининг мақсади, предмети, турларини белгилаш;

ўзи таъсис этган Марказ низомига ўзгартириш ва қўшимчалар киритиш;

Марказ раҳбари билан тузилган меҳнат шартномасини меҳнат тўғрисидаги қонун ҳужжатларида белгиланган тартибда муддатидан олдин тўхтатиш;

Марказни қайта ташкил этиш ёки тугатиш тўғрисида қарор қабул қилиш, тугатиш комиссиясини тайинлаш ва тугатиш балансларини тасдиқлаш;

Марказ мулкига оид битишувларни ҳақиқий эмас деб эътироф этиш тўғрисида даъво билан судга мурожаат қилиш;

Марказнинг ортиқча, фойдаланилмаётган ёхуд белгиланган мақсадда фойдаланилмаётган мулкни олиб қўйиш ва уларни тасарруф этиш;

зарурат бўлганда Вазирлар Маҳкамасига марказни хусусийлаштириш ёки давлат тасарруфидан чиқариш бўйича таклифлар киритиш;

Марказга етказилган зарарларни ундириш тўғрисида марказ раҳбарига нисбатан даъво тақдим этиш.

Марказ раҳбарини тайинлаш, меҳнат тўғрисидаги қонун ҳужжатларига мувофиқ унинг билан меҳнат шартномасини тузиш;

Марказ давлат рўйхатидан ўтказилган вақтдан бошлаб уч мобайнида марказнинг низом фондиди унга давлат мулкани тезкорлик билан бошқариш учун бериш йўли билан шакллантириш;

ҳар йили Марказнинг штат жадвалини ва харажатлар сметасини тасдиқлаш, ҳар ярим йилликда (йилда икки маротаба) ижро этувчи органнинг унинг бажарилиш ҳақидаги ҳисоботини эшитиш;

бозор қиймати энг кам ойлик иш ҳақининг минг баравари миқдоридан ошадиган мол-мулкани тасарруф этиш учун марказнинг ижро этувчи органига рухсатномалар бериш тўғрисидаги қарорни тегишли равишда Давлат ракобат қўмитаси билан келишиш;

марказга берилган давлат мулкидан мақсадли фойдаланилишини ва сақланишини, шунингдек унинг бегоналаштирилишини назорат қилиш;

## **V. Васийлик кенгаши, унинг ҳуқуқ ва мажбуриятлари**

12. Марказнинг самарали фаолият олиб бориши учун республикада геннокаут технологияси асосида ғўзанинг янги истиқболли навларини яратиш, уларни дала шароитида синаш, уруғларини кўпайтириш, районлаштириш ишларига кўрсатаётган ҳомийлик ёрдамларини келгусида ҳам қўллаб-қувватланишини инобатга олган ҳолда унинг қошида Ўзбекистон Республикаси Фанлар академияси, Қишлоқ ва сув хўжалиги вазирлиги ҳамда “Ўзпахтасаноат” акциядорлик жамияти иштирокида “Васийлик Кенгаши” фаолият олиб боради. Марказ фаолиятида юқори инновацион технологияларни лицензиялашдан олинадиган фойдадаги улушлар миқдори “Васийлик Кенгаши” қарори билан белгиланилади ва ўзгартирилади.

13. Васий ташкилотларнинг вазифалари қуйидагича белгиланади:

- Ўзбекистон Республикаси Фанлар академияси - Марказда фундаментал ва амалий тадқиқотларни дунё фани даражасида ривожлантириш, уларнинг давлат илмий-техник дастурлари доирасида устувор равишда молиялаштириш, илмий кадрларни тайёрлаш ва мутахассисларни чет мамлакатларнинг нуфузли марказларида малакасини ошириб бориш ҳамда тўпланган билим ва тажрибаларни олий таълим тизими билан узвий боғлиқлигини таъминлаш;

- Қишлоқ ва сув хўжалиги вазирлиги – Марказда яратилган қишлоқ хўжалиги экинларининг янги истиқболли навларини дала шароитларида кенг синаш, уруғларини кўпайтириш, ишлаб чиқаришга жадал жорий қилиш ҳамда олиб борилаётган тадқиқотлар учун устувор тарзда инновация маблағларини ажратиш;

- “Ўзпахтасаноат” акциядорлик жамияти – Марказ моддий-техника баъзасини мустахкамлаш учун мунтазам равишда инвестиция маблағларини ажратиб бориш ва энг муҳим янги технологияларни тижоратлаштиришда моддий ёрдам кўрсатиш бўйича ўз таклифларини бериш ва имкониялари доирасида молиялаштиришни амалга ошириш.



## **VI. Геномика ва биоинформатика маркази фаолиятини ташкил этиш**

14. Геномика ва биоинформатика марказига Ўзбекистон Республикаси Фанлар Академиясининг буйруғи билан лавозимга тайинланадиган директор раҳбарлик қилади.

Директорнинг тавсиясига кўра илмий ва умумий ишлар бўйича директор ўринбосарлари ҳамда илмий котиби Ўзбекистон Республикаси Фанлар Академияси буйруғи билан лавозимларга тайинланади ва лавозимлардан озод қилинади.

15. Директор:

Геномика ва биоинформатика марказига юклатилган вазифалар ва мажбуриятларни бажарилиши учун жавобгар ҳисобланади;  
ҳодимлар ўртасида вазифаларни тақсимлайди;

Марказ ходимларини белгиланган тартибда лавозимга тайинлайди ва лавозимдан озод қилади;

Марказнинг ходимлари томонидан бажарилиши мажбурий бўлган буйруқлар чиқаради, уларнинг ижроси устидан назоратни ташкил қилади;

қонун ҳужжатларида белгиланган ваколатлар доирасида бошқа ваколатларни амалга оширади.

Марказ директори лавозимига мувофиқ Илмий кенгаш раиси ҳисобланади. У бўлмаганда, марказ директорининг илмий ишлар бўйича ўринбосари Илмий кенгашга раислик қилади, марказнинг илмий котиби бир пайтнинг ўзида Илмий кенгаш котиби ҳисобланади.

### **VI. Марказнинг Илмий кенгаши:**

16. Илмий кенгаш илмий ва илмий-ташкилий орган ҳисобланади.

17. Илмий кенгаш таркиби Ўзбекистон Республикаси Фанлар Академияси буйруғи билан директорнинг тавсияси бўйича 5 йил муддатга, директорнинг ваколат муддати доирасида тасдиқланади.

илмий кенгаш дастурлар, грантлар, йиллик ва тажриба-конструкторлик ишлари лойиҳаларини, илмий кадрлар тайёрлаш ҳамда кенгашлар, конференциялар ўтказиш режаларини кўриб чиқади ва тасдиқлайди;

Марказнинг барча асосий бўлинмалари ва марказ бўйича илмий ва илмий-ташкilotчилик фаолиятининг муҳим натижалари тўғрисидаги ҳисоботларини кўриб чиқади ва тасдиқлайди;

Марказнинг структуравий ўзгаришлари билан боғлиқ масалаларни муҳокама қилади;

муҳим илмий муаммоларни аниқлайди, илмий маърузаларни тинглайди ва марказнинг илмий ишлари натижаларига баҳо беради;

Марказнинг илмий ишлар тўпламини тайёрлаш ва нашр қилиш режасини кўриб чиқади. Марказнинг илмий ишлар тўпламини ва ходимларнинг режадаги ишларини чоп этишга тавсия қилади;

бошқа илмий муассасалар, шу жумладан халқаро ва чет эл муассасалари билан ҳамкорлик режаларини бажаришни мувофиқлаштириш масалаларини муҳокама қилади;

фан докторлиги диссертациялари мавзуларини тасдиқлайди;

илмий кадрлар тайёрлаш ва уларнинг малакасини ошириш билан боғлиқ масалаларни муҳокама қилади, илмий кадрлар тайёрлаш бўйича олимларнинг ахборотини мунтазам равишда тинглайди;

диссертациялар ҳимояси бўйича ихтисослашган кенгаш шахсий таркибини тасдиқлашга тавсия қилади ва унинг фаолияти тўғрисидаги ҳисоботни тинглайди;

Марказ олимларини йирик илмий асарлар, илмий ихтиро ва кашфиётлар яратганликлари учун уларни Давлат мукофотларига тавсия қилади;

Олий Аттестация Комиссиясига илмий унвон олиш учун тавсия беради;

илмий-тадқиқот бўлинмалари мудирлигига, вакант бўлган етакчи ва катта илмий ходим лавозимларига танлов ўтказиши;

илмий кенгаш аъзоларининг 2/3 қисми ёки ундан ортиғи Кенгаш мажлисида қатнашганлари тақдирда, кенгаш қарор қабул қилиш ваколатига эга. Агар кўрилатган масала мазмуни яширин овоз беришни талаб қилмаса, қарор очиқ овоз бериш йўли билан қабул қилинади;

илмий кенгаш қарори юридик кучга эга ва илмий-тадқиқот муассасаси ҳамда унинг ходимлари фаолиятига жорий қилиниши шарт, қабул қилинган қарорлар етарли асосга эга бўлмаган тақдирда Илмий кенгашнинг ўзи томонидан қайта кўриб чиқилиши ва бекор қилиниши мумкин;

тадқиқотчиларни моддий рағбатлантириш жамғармасидан рағбатлантириш учун тавсия қилиш.

## **VII. Геномика ва биоинформатика марказининг иқтисодий фаолияти асослари**

18. Геномика ва биоинформатика марказининг мулки қуйидагилардан иборат:

Давлат бюджети ва белгиланган тартибда жалб қилинган бюджетдан ташқари маблағлар (ташқи ва ички инвестициялар, ишлаб чиқариш ва интеллектуал мулк маҳсулотларини сотишдан келадиган даромадлар, ҳомийларнинг беғараз бадаллари ва бошқалар)

Ўзбекистон Республикаси Фанлар академияси ҳамда васий ташкилотлар Ўзбекистон Республикаси Қишлоқ ва сув хўжалиги вазирлиги ҳамда “Ўзпахтасаноат” акциядорлик жамияти томонидан Геномика ва биоинформатика марказига оператив бошқариш ҳуқуқи билан бириктирилган мулк;

қонун ҳужжатларига зид бўлмаган бошқа манбалар ҳисобига шакллантирилади.

19. Геномика ва биоинформатика маркази мулкининг қиймати корхонанинг мустақил балансида акс эттирилади.

20. Геномика ва биоинформатика марказининг штат жадваллари ва харажатлар сметаси Ўзбекистон Республикаси Фанлар академияси томонидан тасдиқланади.

21. Геномика ва биоинформатика маркази ўз фаолиятдан олинган даромадларидан амалдаги қонунчиликка мувофиқ фойдаланади.

22. Геномика ва биоинформатика Маркази мулки бўлинмас мулк ҳисобланади ва корхона ходимлари ўртасида тақсимланиши мумкин эмас.

23. Геномика ва биоинформатика маркази мулкни тасарруф этиш қуйидаги ҳолларда Ўзбекистон Республикаси Фанлар академияси билан келишган ҳолда амалга оширилади:

асосий воситаларни сотиш, уларни гаровга қўйиш, мулкни хўжалик жамияти Устав фондига улуш сифатида қўшиш, хўжалик жамиятларидаги тегишли акцияларни (улушларни) сотиш, мулкни корхона фаолияти мақсадларига мувофиқ бўлмаган ҳолда бошқача тарзда тасарруф (балансдан чиқариш ва ҳ.к.) этиш ва бошқалар.

24. Бино ва иншоотларни (шу жумладан қурулиши тугулланмаганларни) сотиш Ўзбекистон Республикаси Хусусийлаштириш, монополиядан чиқариш ва рақобатни ривожлантириш давлат қўмитаси томонидан амалга оширилади.

### **VIII. Ҳисоб ва ҳисобот тақдим этиш**

25. Марказнинг ҳисобот даври тугагач ваколатли органларга молиявий ҳисоботни ва рўйхати қонун ҳужжатларида белгиланган бошқа ҳужжатларни тақдим этади ҳамда ҳужжатларнинг сақланиши ва уларнинг белгиланган тартибда давлат томонидан сақлашга берилиши учун жавоб беради.

### **IX. Геномика ва биоинформатика маркази фаолиятини қайта ташкил этиш ва тугатиш**

26. Геномика ва биоинформатика маркази фаолиятини қайта ташкил этиш ва тугатиш амалдаги қонунчиликка мувофиқ амалга оширилади.